

CICIKOANBÁDIEGU

BULICINA FASO

Ti baa dógú pò, li yaa dani kúuma, ti baa paadí

GUFENEMA MASOAGINDO

**BÀALÓ KOANBÁLA TÁÁNLI
JÁGA DOAGIDIMA**

(PP-G N°014-2026)

Pengidiwende Silibeedi WEDIRAWOGO

Bobo Julaso, li binli 2026 cinaa dana 24

Báaló Koanbála táánli den kàli Bobo Julaso
nani ban mááni ki tiédi màamà dana lele kúli,
li binli 2026, cinaa dana 24, alijima daali
ki cili leeri 9 yogunu ki ban gbeni leeri 11 leni miniti 44,
Kapitenni Ibirayimi TARAWORE, yua n tié ti Diema Yudanciamo
leni a Koanbála Táánli Lìgìyúa n den gobidi laa táánli.

A Koanbála Táánli den noanli li daali máyùla nni
ki tàà a jága, ki púni i làabáali,
ki dini bi niba a bála li tuonli pò,
ki púni u sànú bi niba n gedi dietoama nni ti diema yèli pò.

I. A JÁGA

I.1. YAA KOANBADIEGU N DIE BU TOABU LENI U BÁADOGU GUUDIMA TUONA KANI.

A Koanbála Táanli kpaagi ban bogini yaa báli máama pò ki waani Bulicina Faso nni ban baa taa yaa minteela boncianla ki pugini bu toabu pò cágili n baa ñoadi màamà.

Ti diema ye leni a nibiada miligima muali hali màamà ke li pundi mi diema niba kúli n táani ki fii ki koani ki gáa ti báadógú. Laa bonla pò, li tié tilade yogunu kúli ban yen le ban baa ñanbi ki bogini màamà mi diema guunli jakoanda bu toabu pò ki ñoadi nani moala ne Afiriki leni li ñandunli dogi nni yaa pàka n ye li guunli sanbila nni.

Ki fidi ki súágí leni mi diema guunli aniali tuona, nani yùcéli yanbuama jakoanda táama u báadogu koaguudima pò, li pundi ban kaani minteelicàgili ki pugini ki gó ñanbi ki bogini laa cágili bu toabu pò.

Ban bogini yaa báli máama nne baa teni ban baa kaani yaa minteelicàgili bu toabu pò n bàà yaa báli máama n dagidi nani mi diema nni lan bili màamà. Laa cágili baa boagidi cágibila lie :

- li cágiyenli baa yaa tié ban taa yaa niba ke bi ji mali ki bani li minteelituonli, ki baa fidi ki fii bu toabu pò lan tie yaa yogunu kúli ;
- li cágilieli mo baa yaa tié yaa niba ke bi baa taa ba ki yuandi ki bangi ba ti minteelidi tuonli ki teni yogunubà ban yen gedi ki ban todi a minteela bu toabu nni.

Ban bogini yaa báli máama nne baa teni ti diema n bàà li guunli tuona pò yaa báli máama n dagidi ki gó tuugi leni mi diema niba lebidimoanma nunlema leni moala ne li guunli tuona n naani nni ki bogini màamà.

A Koanbála Táanli tùó ke ban bogini yaa báli máama yeni n pundi Depiteenba Tuonsoadiegu kani.

I.2. YAA KOANBADIEGU N DIE U LOAGU LENI I LIGI KUBIMA TUONA KANI

A Koanbála Táanli taa **tiwaankayenli** ke li tuugi leni li binli 2027 ki yaa cá hali 2029 tuona ligi boginma tili.

Bàaló tuona boginma sanbila báli máama yaama n tuugi leni Bàaló ligi kubima báli máama tili ban den ñani yaali li binli 2015, piiga n cilo dana 06 ke li lanba tié n°073-2015/CNT, li lanbonli 54 nni, li bili ke Bàaló ligi kubima báli máama boginma tili li binli pò dianma baa ñii Bàaló n baa soani yaa tuona bina taa ligi boginma tili pò ban yi yaa tili DEPEBEPE ;

Bàaló tuona ligi boginma tili, DEPEBEPE n lingi yàala tié ki pugini Bàaló tuona ligi boginma sanbila ñamu ki gó teni laa sanbila n yaa tuugi leni u loagu tuona n kuandi yaa ligi mi diema nni.

Li binli 2027 ki yaa cá hali 2029 tuona ligi boginma tili ñii sanbila taa (03) pò, lani n tié ban daani yàala sanbili, ban ki daani yàala sanbili leni lan li bili ke li bonla baa ñuadi màamà sanbili.

Lan li bili ke li bonla baa ñuadi màamà sannbili ñii mi diema tinbuona diedima leni ku siaṅangu pò. Yeni, u loagu tuona baa pugini lan bua ki pundi kobiga yùli pò 6,1% ne leni li binli 2027, 5,5% ne leni li binli 2028, 5,3% ne leni li binli 2029.

I ligikuake táanma baa bua ki pundi **miliyari 3 924,3 Seefa ligi nni** ne leni li binli 2027, **miliyari 4 328,8 Seefa ligi nni** ne leni li binli 2028, **miliyari 4 686,4 Seefa ligi nni** ne leni li binli 2029 ; lani n bundi ke binli kúli yaa ligi n baa pugini baa yaa tié kobiga yùli pò 9,3%.

I ligiñake mo yaa táanma baa fidi ki pundi **miliyari 4 543,3** li binli 2027 nni, **miliyari 4 992,2** li binli 2028 nni leni **miliyari 5 403,6** li binli 2029 nni ; lani n bundi ke binli kúli yaa ligi n baa ña baa yaa tié 9,1%.

Yàala n tié mi diema n baa fidi ki bili yaa ligi ti ligidiedi nni mo, i baa fidi ki pundi **miliyari 892,0 Seefa ligi nni** li binli 2027 nni, lan cie li binli 2026 nni ban den fidi ki bili yaa ligi yàala n pundi **miliyari 222,2 Seefa lii nni**. I ligibilike baa bua ki pundi **miliyari 1 154,6 Seefa ligi nni** li binli 2028 nni leni **miliyari 1 355,8 Seefa ligi nni** li binli 2029 nni.

Yaa ligi n baa pòadi a tuona soanma pò mo baa fidi ki yaa tié **miliyari 619,0 Seefa ligi nni** li binli 2027 pò, **miliyari 663,4 Seefa ligi nni** li binli 2028 pò leni **miliyari 717,2 Seefa ligi nni** li binli 2029 pò. Ti yaa baa boagini leni laa bintaada siiga mi diema loagu n baa fidi ki kúáni yaa ligi ti baa sùá ke yaa ligi n pòadi baa fidi ki yaa tié kobiga yùli pò 2,8% li binli 2027 leni 2028 nni, 2,9% li binli 2029 nni.

Ki teni ti diema pò yaa tuona n sugini ki soani n baa ki soani, li baa yaa tié tilade i ligi n bogini ki ñoadi mi teginma sanbila ki gó yaa pia mi gobidimoanma.

I.3. YAA KOANBADIEGU N DIE TI DIEMA LENI DIETOAMA SIIGA DANTAADI KANI

A koanbála táanli den kpaagi ki **bogini bali máama lie (02)**.

Ban bogini yaa cicibáli máama tuugi leni Bàaló n mia Depíteenba n páa u sanu ban tùó Bulicina Faso Gufenema, Mali Gufenema leni Niseeri Gufenema n den táani ki ñii ku danlingu sieditili yaali li binli 2025, piiga n ciyendo dana 26 Wagidugu dogu nni ki baa cilini Sayeli dogi tuginyenma dajo ke bi yi laa dajo mi folima nni «**Daande Lipitaako** » lani n bundi «**Lipitaako nialu** ».

Sayeli dogi taanyenma càgili (AYESI) bani ke mi làabáalitenma n tie bi nunlema ñialimoanli. Lani yaa po n teni ke bi den táani ki ñii Sayeli dogi

taanyenma dajo ke bi yi o mi folima nni «**Daande Lipitaako** » cilima sieditili li binli 2025, piiga n ciyendo dana 26 Wagidugu dogu nni». Laa dajo baa tùa Sayeli dogi táanyenma niba pò i làabáalitenma tuonsoantiagu yaagu n baa teni li càgili dogi niba kuli n yaa pia mi tuginmoanma leni biyaba.

Laa dajo cilima n lingi yàala mi kpiana tié ki teni Sayeli dogi táanyenma càgili niba n yaa bààdi yaa làabáali n tuugi leni li càgili dogi n táani ki pia yaa nunlema, ban bogini ki tuuni yaa tuona. Mi liema, li tié ki teni i laabaalimoani n fidi ki findi li càgili dogi nni kelima moala ne mi laabaali faama yabidi li ḡandunli nni.

Ki teni Depiteenba n páa u sànú Bàaló n tùó laa dajo cilima baa teni ti diema n bàà ki soani laa làabáalitenma tuonsoantiagu n bua yaa tuona kúli ki go todi yaa dogi n taani ki kaani Sayeli dogi taanyenma (AYESI) càgili juogu paalu n pugini.

A Koanbála Táanli puni u sanu ke ban bogini yaa báli máama ne n pundi Depiteenba tuonsoandiegu kani.

Ban bogini **li báli máamaliema yaama** tuugi leni Bàaló n mia Depiteenba n páa n páa u sànú ban tùó Bulicina Faso Gufenema, Mali Gufenema leni Niseeri Gufenema n den táani ki ñii ku danlingu sieditili yaali li binli 2025, piiga n cilie dana 21 Bamako dogu nni ki baa cilini Sayeli dogi tuginyenma tele ke bi yi laa tele Tamaseki máama nni «**Tafuki TIVI** » lani n bundi «**U yìènú** »

Laa tele baa todi Sayeli táanyenma càgili dogi niba máàsùàdi, mabuoli leni ban táani ki tùó yaa tuada leni yaa bogida findima, lan teni u juogu leni u taayenamu n yaa ye AYESI dogi leni a nicaga siiga. Laa tele gó baa todi a nicaga leni i tundi yaala n tie bi niba kúli yema ḡamu tuona soanma pò, mi yanduanma, li guunli, toriyaba leni u taayienu ḡamu tuada bi niba siiga leni u loagu sanbila findima pó.

Ki teni Depiteenba n paa u sanu Baaaló n tuó Tele « Tafuki TV » cilima baa teni ti diema n baà ki soani laa laabaaalitenma tuonsoantiagu n bua yaa tuona kúli ki go todi yaa dogi n taani ki kaani Sayeli dogi taanyenma (AYESI) càgili juogu paalu n pugini.

A Koanbála Táanli puni u sanu ke ban bogini yaa báli máama ne n pundi Depiteenba tuonsoandiegu kani.

I.4. YAA KOANBADIEGU N DIE MI TAGIMA TUONSOANDIEDI, U KPENDU LENI U NUU TUONSOANBANMA TUONA KANI

A Koanbála Táanli taa **másienkàama tili yenli** yaali n goa ki pegidi ban den kpa ñani yaa **másienkàama tili** li binli 2024 cilele dana 25 ke li lanba tie n°2024-857/PRES/PM/MDICAPME/MFPTPS/MEFP ki puni u sanu ban bili Baaaló tuonsoanjaana, Baaaló tuonsoandiedi yaadi n diidi bi niba yema ñamu gobidima pò (EPPESE) leni boncelidanba leni Baaaló n táani ki die yaa tuonsoajaana àmá ke Baaaló yaa biinu n yabi ki cie nni tuonsoanba panpaani sienma sanbila.

Laa **másienkàama tili** lebidima bua ki jagi ki dagini i panpaani ki go bolini yaa paarima n ye Baaaló tuonsoandiedi nni tuonsoanba ñmaligi siiga leni yaa todima n ye a tuonsoancaga nni, Baaaló tuonsoandiedi yaadi n diidi bi niba yema ñamu gobidima pò leni leni boncelidanba leni Baaaló n táani ki die yaa tuonsoajaana àmá ke Baaaló yaa biinu n yabi ki cie.

Li boncànla yaala n tugi yùli laa **másienkaama tili** n tie :

- ki teni V càgili tuonbuoli n do ki gedi B càgili baà ke bi tuonsoanba ki baà bangima bà;
- ki cilini li càgiluobili tuonbuoli ke laa càgili tuonsoanba tuona baa yaa tié nani mi piidima, mi jaama, mi duunma leni mi pedima;
- ki táani laa tuongagidikaana tuonsoanba i ñmapani boginma sanbila nni.

Laa másienkaama tili gó baa teni Bàaló tuonsoanjaana tuonsoanba nmapani gobidima n nɔadi fuuyenli nani tuonsoanjaali kuli loagu gbamanu n da màama.

Laa másienkàama tili táama baa teni ti diema nni Bàaló tuonsoandiedi yaadi n diidi bi niba yema nmu gobidima pò leni boncelidanba leni Bàaló n táani ki die yaa tuonsoajaana àmá ke Bàaló yaa biinu n yabi ki cie nni tuonsoanba panpaani sienma sanbila n nɔadi fuuyenli.

II. I LÀABÁALITENKE

II.1. Yaa koanbali n die u loagu leni i ligi kubima tuona puni **laabaali lie** :

- **u làabáalikpialu** tuugi leni u báadogu buama todima ligi táanma li binli 2023 ki gedi 2025, leni yaa ligi n táani li binli 2026 ciciŋmataari nni.

Li binli 2023 ki gedi 2025 yogunu, yaa ligi n táani kuli fii **k 496 966 049 221 sefa ligi** ; ki sua ban den bili ke yaa ligi n baa táani den baa fii **miliyaadi 400 sefa ligi**. Laa ligiciami nni u biinciamu ñani a luba leni a bancana pama nne (i ligitaanke 54%). Ban taagi binli kuli yaa ligi doagidi ke i ligitaanke yabidi ki pugidi : 99,33% li binli 2023 nni, 117,12% li binli 2024 nni leni 148,16% li binli 2025 nni.

Li binli 2025 nni, yaa ligi n táani fii **222 242 025 258 sefa ligi**, lan tie ke mi pugina pundi 26,50% ti ya boagini leni 2024 binli. Ban biani yaa ligi fii **276 087 101 992 sefa ligi**, ki sua ban den bili ki baa ñani yaa ligi den tie **277 957 028 326 sefa ligi**, lan búndi ke yaa tuona n soani pundi 99,33%.

Li binli 2026 ciciŋmataadi nni, li haniali baa suagi liiga kelima yaa ligi n táani pundi **45 298 122 165 sefa ligi**, lan tie ban den bili ke yaa ligi n baa kua laa yogunu nni 22,65%.

Ku bondaagu kani, ban biani yaa ligi li binli 2026 ciciŋmataadi nni fii **36 988 141 037 sefa ligi**, lan tie ban den bili ki baa biani yaa ligi pò 85,37%. Laa yogunu nni, i ligiñake kuli táanma fii **26 305 095 112 sefa ligi**, lan tie 71,12% ku bondaagu ligibianke nni.

Bina taa puoli, u báadogu buama todima ligi tua tin ñani ti yuceli pò yaa tuonsoantiamoangu ti guunli tuona pò ke li kpendinni ti ñuadi.

U làabáalielu tie ban den boagini Bàaló tuonsoanba ŋmapani tili leni ti koanbadiedi tuonsoanba tila n mali yaala.

Ban den boagini Bàaló tuonsoanba ñmapani tili leni ti koanbadiedi tuonsoanba tila li binli 2025 piiga n cilo yogunu, bi sua ke yaa tuonsoanba n gaani i ñmapani den tie niba 207 903, ki tie ban baa fidi ki boagidi yaaba caga taa (03) :

- **tuonsoanba 34 901** yèla ye saliwuudi tila nni ama ki naa ye Bàaló tuonsoanba ñmapani tili nni ; laa niba baa fidi ki ya tie yaa tuonsoanba n gaa bi fuodima, yaaba n jidi li tuonli bonla ba pò, yaaba n gedi pòtogu ki ban tuuni bi yaaba n da guu bi ñmapani ;
- **tuonsoanba 193 423** tie yaaba yaa yela n ye i kaanliedi kuli nni ;
- **tuonsoanba 14 480** gáani bi ñmapani Bàaló ligikpagu nni (SIGASIPEYE) ama ke bi yela naa yen ña ti koanbadiedi n yen tuuni yaa lila nni .

Ban ñanbi ki kpaagi **tuonsoanba 14 480** leni **tuonsoanba 193 423** pò maama teni ke bi fidi ki gagidi **tuonsoanba 1 488** ki tie yaaba n gáani i ñmapani ke laa ñua li fuuli. Li yaapò, bi sieni **niba 1 488 ñmapani** ki tie yaaba n ki go tuuni, yaaba n kpe, yaaba n gaa bi fuodima, yaaba n sani ki ñaa bi tuonli bi yaaba n kaa ñua li tuonli sanbila.

Moko, **tuonsoanba 2 346** tie yaaba n guani ki gedi u cogu ki nan baa ki gaani yaa ligi ke baa naani ki gaa.

Yaa jaga n taa yeni baa cuani yaa ligibilike n yabi Bàaló pò. yeni, ban sieni yaa ñmapani yeni baa teni binli nni tin baa yaa ligibilike n pundi **miliyaadi 2,43 sefa ligi**. Bi ya siegi siegi ki dagini yaa ligi ke bi tuonsoanba yaaba n guani ki gedi u cogu gaani ki naa bi naani ki yaa gaani, i ligibilike kuli táanma baa fidi ki pundi binli kuli **miliyaadi 5,66 sefa ligi**. Yaala n pugidi tie ke bi ya baa goa ki táani yaa ligi ke bi ñandi ki pa ke laa ñua u sanu, i baa pundi **919 26 474 sefa ligi**.

III. BAN DINI YAABA A BÁLA

III.1. BAN DINI YAABA A BÁLA YENDI YENDO TUONA NNI

- LI GUUNLI KOANBADIEGU KANI

- O joa Wendibénédo Hipòliti WEDIRAWOGO, o tie Minteeligbeeli, bi dini o li báli ke o túà ti diema tuonsoanjaali yaali n guu i wulagbikaani (ONASINMI) kani wula lingima kpaagibandili tuona Yudaano.

- YAA KOANBADIEGU N DIE TI DIEMA LENI DIETOAMA SIIGA NANTAADI.

- O joa Isufu WEDIRAWOGO, o lanba li tuonli nni tie **111 091 C**, o tie Bàaló ligidiedi goandikoa, bi dini o li báli ke o túà Bulicina Faso tondo saliwuudidiegu Keeri(Ejipiti) Ligikubilo ;

- O joa Bolo BASIE, o lanba li tuonli nni tie **245 207 Y**, o tie Bàaló ligidiedi goandikoa, bi dini o li báli ke o túà Bulicina Faso tondo saliwuudidiegu Adisabeba (Etiopi) Ligikubilo ;

- O joa Mohamadu SUGE, o lanba li tuonli nni tie **58 455 U**, o tie Bàaló ligidiedi goandikoa, bi dini o li báli ke o túà Bulicina Faso tondo saliwuudidiegu Senevi (Siwisi) Ligikubilo ;

- O joa Hodu DAWO, o lanba li tuonli nni tie **91 635 D**, o tie Bàaló ligidiedi Goandikoa, bi dini o li báli ke o túà Bulicina Faso tondo saliwuudidiegu Birasilia (Birésili) Ligikubilo;

- O joa Wendipuginoma Vikitoori BONKUNGU, o lanba li tuonli nni tie **225 059 Z**, o tie Bàaló ligidiedi goandikoa, bi dini o li báli ke o túà Niwiyoriki (USA) Ligikubilo.

- KU DIEGU YEMA LENI TORIYABA KOANBADIEGU

- O joa Suewole Silikilisiti JESANA, o lanba li tuonli nni tie **108 598 P**, o tie koanbadiegu tuonsoandiedi gobidikoa, bi dini o li báli ke o túà ku koanbadiegu tuona yankpaagidaano;

- O joa Pèliga **KABORE**, o lanba li tuonli nni tie **109 086 X**, o tie koanbadiegu tuonsoandiedi gobidikoa, bi dini o li báli ke o túà ku koanbadiegu tuona yankpaagidaano ;
- O joa Jan-Beritiran **BAWUARI**, o lanba li tuonli nni tie **237 915 Z**, o tie yaa tuonsoanba n moa ke paadima n da ye joa leni pua siiga tundikoa, bi dini o li báli ke o túà ku koanbadiegu tuona yankpaagidaano ;
- O joa Osikaari **DANBELE**, o lanba li tuonli nni tie **85 579 U**, o tie a biñinda cogidiena gobidikoa, bi dini o li báli ke o túà ku koanbadiegu tuona yankpaagidaano ;
- **VALIA** pua Aminata /**KINNORE**, o lanba li tuonli nni tie **205 437 W**, o tie yaa cogu n ye celi cogidiena tuona goandikoa, bi dini o li báli ke o túà ku koanbadiegu tuona yankpaagidaano.
- **YAA KOANBADIEGU N DIE TI BUUDI TUONA KANI**
- O joa Emili Fidèli Konatie **DALA**, o lanba li tuonli nni tie **130 430 U**, o tie Bàaló tuonsoanlo yua n pia u sanu ki jia ti buudi bi ki maadi nilo kuli pò, bi dini o li báli ke o túà li koanbáli todikoa.
- **U BÁADOGU MAAMA TUONA KOANBADIEGU**
- O joa Mokitaari **SAWADOGO**, o lanba li tuonli nni tie **205 533 Y**, o tie li tanmaali bandiciamo, bi dini o li báli ke o túà a diegbenga, a dieduada leni li bonmaakaala tuona Yudanciamo ;
- O joa Mumuni **ILIBUDO**, o lanba li tuonli nni **216 124 W**, o tie li tanmaali bandiciamo, bi dini o li báli ke o túà li sancenli bonmaakaala tuona Yudanciamo ;
- O joa Mamadu **YUGIBARE**, o lanba li tuonli nni tie **248 620 X**, o tie li tanmaali bandiciamo, bi dini o li báli ke o túà a tuona teginjanma leni a banma lingima Yudanciamo ;
- O joa Solimani Hamedi **WATARA**, o lanba li tuonli nni tie **215 173 W**, o tie ki tinga cogu boginma bando, bi dini o li báli ke o túà i dociami nni yema, li diemaali leni mu tinmu fanma biigima tuona Yudanciamo ;

- O joa Salifo **PASERE**, o lanba li tuonli nni tie **92 726 L**, o tie li tanmaali bandiciamo, bi dini o li báli ke o túà li bonmaakaala leni yaa piama n tie bonmaakaala kubiŋanli Yudanciamo.
- **YAA KOANBADIEGU N DIE A BONWAALA COGU, TI MAAMAAMAAMA COGU LENI TI DIEMA MABUOLI FINDIMA**
- **WATARA** pua Katerini /**TARAWORE**, o lanba li tuonli nni tie **43 997 H**, o tie a bicegidikaana cogicàmbaa, bi dini o li báli ke o túà li koanbáli todikoa;
- O joa Fidèli **BILIGO**, o lanba li tuonli nni tie **50 347 S**, o tie A biwaala cógú, ti máamaamáama cógú leni ti diema mabuoli findima tuona goandikoa, bi dini o li báli ke o túà a biwaala cogu gbanansaagu jelibuoli, ku maasuagu leni li yankuali tuona Yudaano.
- **YAA KOANBADIEGU N DIE A COGIBIGBENGA COGU LENI MI BANCANMA LINGINMA TUONA**
- O joa Silibeeri **NIADA**, o lanba li tuonli nni tie **324 170 A**, o tie a tinbuona tuona gobidikoa, bi dini o li báli ke o túà u cogu leni mi bancanma lingima tuona todima ligicagili (FOSERI) Bangire Baoobo Tidianyudaano;
- O joa Báli Ansi Karilosí **NEBIE**, o lanba li tuonli nni tie **324 492 M**, o tie a tinbuona tuona gobidikoa, bi dini o li báli ke o túà iniverisité Fositen (SIBI) Tidianyudaano.

III.2. BAN DINI YAABA A BÁLA A TUONSOANJÀANA YELI PÒ

A Koanbála Táanli den baa ban dini yaaba a bála a tuonjaana tuona boginma pò:

- mi diema nni li yanwubili tuona bangima cogidieli (ENESA), yaa koanbadiegu n diidi bu kpaabu, mi ñima, li yanwubili leni mi ñima nni bonpiakàala tuona yèli nni;
- Bulicina Faso loagi findima leni bi niba yema ñamu ligicàgili (FEBEDESI Tonwogo) leni yaa tuonsoandiegu n diidi mi diema nni bi niba coali leni bi yema n cuoni maama (INESIDE), yaa koanbadiegu n die u loagu leni i ligi kubima tuona yèli nni;
- mi diema tuonsoanjaali yaali n guu i wulagbikaani (ONASINMI), li guunli koanbadiegu yèli nni.

A. YAA KOANBADIEGU N DIIDI BU KPAABU, MI ÑIMA, LI YANWUBILI LENI MI ÑIMA NNI BONPIAKAALA TUONA

A Koanbála Táanli taa **másienkàama tili yenli** ki dini li báli o joa Uséni **TARAWORE**, o lanba li tuonli nni tie **324 709 A**, o tie bi niba gobidima tuona tundikoa, o túà mi diema nni li yanwubili tuona bangima cogidieli (ENESA) tuona boginma cagili Gobidikoa, mi diema niba tuonsoanba koanbadiegu yèli nni, Bàaló yèli pò, o cici báli pò bina taa (03), ki tua o joa Emanuweli NIÑAN lèbidu.

B. YAA KOANBADIEGU N DIE U LOAGU LENI I LIGI KUBIMA TUONA KANI

A Koanbála Táanli taa **másienkàama tila lie (02)**.

Mi másienkàama tikpiali dini li báli o joa Jan Abeli **TARAWORE**, o lanba li tuonli nni tie **333 983 R**, o tie Iniverisité cogicanbaa, o túà Bulicina Faso loagi findima leni bi niba yema ñamu ligicàgili (FEBEDESÍ Tonwogo) tuona boginma cagili Gobidikoa, Bulicina Faso Yudanciamo badidiegu yeli nni, Bàaló yèli pò, o cici báli pò bina taa (03).

Mi másienkàama tilieli dini li báli o joa Ali **SAWADOGO**, o lanba li tuonli nni tie **97 434 W**, o tie a tinbuona tuona gobidikoa, o túà yaa tuonsoandiegu n diidi mi diema nni bi niba coali leni bi yema n cuoni maama (INESIDE) tuona boginma cagili Gobidikoa, yaa koanbadiegu n die mi diema tinbuona gobidima leni a sancena tuona yèli nni, Bàaló yèli pò, o cici báli pò bina taa (03).

C. LI GUUNLI KOANBADIEGU KANI

A Koanbála Táanli taa **másienkàama tili yenli** ki dini li báli o joa Adama **WEDIRAWOGO**, o lanba li tuonli nni tie **248 494 X**, o tie mi gaanilindima tuona goandikoa, o túà mi diema tuonsoanjaali yaali n guu i wulagbikaani

(ONASINMI) tuona boginma cagili Gobidikoa, yaa koanbadiegu n diidi bu kpaabu, mi ñima, li yanwubili leni mi ñima nni bonpiakàala tuona yèli nni, Bàaló yèli pò, o cici báli pò bina taa (03), ki tua o joa Nongibila Esèni BALMA lèbidu.



www.sig.gov.bf

Gufenema Másoagindo



Pengidiwende Silibeedi WEDIRAWOGO

O bàà Bàaló jaandi leni Tanjoa mààlima